## زكريا ضاحى توفيق

سنابل الخير

أشعار بالعامية المصرية

الطبعة الأولى يناير 2018



#### بطاقة الكتاب

: سنابل الخير المؤلف

المؤلِّف : زكريا ضاحى توفيق

: أشعار بالعامية المصرية التصنيف

رقم الإيداع : 2017-29418

عدد الصفحات: 100 صفحة

رقم الإصدار الداخلي: 16

تاريخ الإصدار الداخلى: 1 – 2018 الطبعة الأولى

الإشراف العام: الشاعرة سميرة محمودي

جميع حقوق الطبع والنشر محفوظة للشاعر، ولا يحق لأي دار نشر طبع ونشر وتوزيع الكتاب الا بموافقة كتابية وموثقة من الشاعر

## دار النيل والفرات للنشر والتوزيع

سجل تجارى: 13242

بطاقة ضريبية: 35-01-572-00031-5-165 رقم التسجيل: 544-662-202

E-mail: alnile waalforat@yahoo.com

twitter: النيل والفرات youtube: alnile waalforat@yahoo.com

facebook: alnile wa alforat

هاتف : 01202541192 - 01116202218 - 01202541192

قية - العاشر من رمضان - مجاورة ١٣ - عقار ٣٠٤ - الدور الثاني - أمام سنتر ١٣



#### إهداء

\*\*\*\*\*

إلى كُل جَسند خَائر أنهكَهُ التمنِّي . إلى كُل عُصفُور كُمِّمَ فَاهُ كي لا يُغَرِّد كي لا يُغرِّد إلى أحبتي , أخوتي إلى جَناحَيِّ الرَحْمَةِ أبي وأمِّي

زكريا ضاحى توفيق

# هَيغَرَّد العُصفُور

إفْتِل خُيُوطْ الأمَلْ فَتَحْ عنيك للنُّور حَياتنا عِلمْ وعَمَلْ والدُّنيا ليها دُسْتُورْ الفَجْر شَقْ الليل حَوَّل سَوادُه نهار والمَطَرَه كانت غِيمْ والمَطَرَه كانت غِيمْ

اِتفَجَرِتْ أنهار
ترْوِي الصَّحَارِي اِلبُوْر
تِنْبِتْ سَنَابِلْ خِيرْ
فَيغَرَّد اِلعَصْفُورْ
يجرِي يجيب اِلقَش
يبنِي بِسُرعَه اِلعِشْ
وينام سعيد مسرور
ع الصُّبح ينْفِش رِيشُه
ويطير يلِف بلاد

شَفْيَانَ لِلُقْمِةَ عِيشُهُ
لو حتى نَهَشُهُ غُرَابْ
عَمَّالْ يلِف يدُور
لو حتى فوق الطُّور
يا مقسِّم الأرزاق
الكرمْنَا يا رزَّاق
بلُقْمَه حِلوَه حَلال
وصِحَّه جَنْب الممال
اكتبلي أعيش مَسْتُور
ولا ابات ذَليل مَكسُور
بَحِبْ كُلْ النَّاسْ
ولَو بِتُوبْ كَسْتُور

## يا وَطَنْ

إيه اللي صابك يا وطن ؟ شُمَّتْ فيك كل الكلاب لابسلى ليه تُوب الكَفَنْ كرَّهتْ فيك طفل وشباب قولنا بُكرا جاي أحلى أتاري بكرا معجون هِباب العرويه لابسه طرحه ماشیه حافیه من غیر شراب أحْكِى إيه لابنى وأقوله لمَّا يسأل عايز أدِلُّه ع الحضاره والتاريخ ع الرموز والجدود

أشرحله كيف وهم وستراب دي كل الدول صابها خراب الغرب طاير للفضا وإحنا قعدنا للفضا نرکب هامر ناکل کَبَابْ أنفض غُبَارَكْ يا وطن طَهَرْ ترابك م العفن بَدِّلْ شِيابَكْ بالشباب رَجَعْ تاريخَكْ للكتاب بَطَلُ مقاوم للمِحَنْ سَطَّرْ حقايق للزمن مفهاش خداع جهل وفتن إيه اللي صابك يا وطن ؟ طمَّ عتْ فيك كُل الكلاب

#### الإبتسامه

\*\*\*\*\*

احلى حاجه الابتسامه بُونبُونَايَه لِلنِفُوس دَعْوَه حِلَوه للسعاده وَبَّلاش من غير فلوس الحياه قاسيه بزياده كل يوم ليها كَابُوس عَربَلِتْنَا م الولادَه طَوَّحِتْنَا كَالْفَاتُوس طَوَّحِتْنَا كَالْفَاتُوس لِلْدَكِي يضْرَب طَنَاش لِلْمَسْاكِل والهُمُوم للهمُوم اللهمُوم اللهموم الل

دا المَكن مَليَان قُمَاش وبالشِياكَه تحلى الهدُوم املأوا بيوتكُم سعاده افرحوا يلًا يا سَادَه

اغسلوا حُزن النفوس

كُل ضحكه ليها ذكرى والفَرخ يبدأ بفكره يبقى كُنْ دايماً بَشُوش اِدِّي غيرك طَرح خيرك اضرب الحُزن بشاكُوش دِي احلى حاجه الابتسامه بُونْبُونَايَه للنفُوس

## هاي و باي

ورْكِبْتْ يَاخُوي هِيُونْدَاي الله يرْحَمْ فَقرْ أَبُوكْ مَلَصْت يَاوَادْ م اِلَّلِي جَابُوكْ وشْربتْ إلرايب بَدَلْ الشَّاي شَبَكْتْ البتْ بوَصْلِتْ نِتْ شَغَّالٌ عَ الشات تِعْجِنْ وتلِتْ لِسَّاكُ عَقْلَكُ عَقْل عِيَالْ وعرفْتْ تقول هَاي و بَاي الله يرْحَم فَقر أبُوكْ بَاعْ المَلْفَحَه لأجْل الشَال عُمرُه مَا مَدْ إيدُه لِحَدْ كُلْ النّاسْ لِيه بتحِبْ

لُقمِتُه حَافْ بَسْ حَلال وانتَ تِقُولِي هَاي وبَاي دَخَلْتْ خَلاصْ الكُليَّه ورْكِبِتْ المَجَرِي وِالْعَرَبِيَّهُ لَكْلَكْتُ فِ جِيبَكْ وَرَقَه بِمِيَّه تُكُونشْ يَاوَادْ خَدْتْ البَهَويّه ورَاجِعْلِي تُقُولِّي هَاي وبَاي كَلْتُ النّايتِي والبَسْبُوسنه وشْربتْ عَصِير وَيَّا المَحْرُوسَه إتمَشِّيتُوا عَ الكورنيش اتوشوشتوا شويش بشويش الله يرحَمْ فَقر أبوك رَاجِعْلِي تِقولِّي هَاي وباي شُفتُوا شَبَابْنَا حِلو إزاي

مِينْ ...؟

مِينْ يحِلْ المسالله . وَأَدِيلُه عَشْرَه جنيه الأُمْ لَابْسَه خَلَقَه والبنت ترتر سواريه إلأب قَاتْلُه الشَّقا والإبن عامِل بيه وَاللَّهِ زَمَنْ العَجَايب أنا بَحكِي أصلا" ليه؟ شَبَابِنَا مَاشِي عَكْس الصُّورَه غير الأصل أخرتنا طَيّب إيه؟ الكدب حبله صغير فبَلاش يا وَلَدِي تِحَوَّر

وتعيش ف دُور البيه دا الأب لَابسْ شَال لا حِيلْتُه جَاه وَلاَ مَالُ مَدْيون لِعَمْ وِخَالْ رَبِّي إبتَلاه بعيال زادوا إلهُمُوم حَوَالِيه المُوضَه مأش فِ إللبس المُوضَه فِ الأخْلاق اللبس يُوم هَيدُوب يبْقَى إلبس الأخْلاق مِينْ يحِلْ المسالله ؟ وَأَدِيلُه عَشَرَه جنيه إلأم لِبسِتْ تِرتِر! والأب عَامِل بيه!

# كُوُمْ تَعَابِينْ

\*\*\*\*\*

مَهما يكون معاك ملايين مَهما تبيع ف الفدادين طَيِّبْ بُكرَا رَايح فِينْ؟ هَتشبيل الطّين ... رَبَّكْ عُمرُه مَا يظلِم حَدْ سَمَّى نَفسنه الحكم العدل رَبْ كَريم رَحمٰن وِرَحِيم هَتشبيل الطين ... زَي الدُّنيَا مَ فيها الخِير فِيها بَرضُو نَاس شَيَاطِين فَاكرَه حَبْل الدُّنيَا طويل

وإن الصبح مَلهُوش لِيل بُكْرَه حِسابكم فِ الجَبَابين هَتْشِلْ الطِّينْ ... تعِيشْلَكُ100فُوق الخمسين تعِيشْلَك 1000 عَ السَبعِين مَهما يكُون إلدُّنيا دِي فانيه فِ لَحظَه تِرُوح عَالَم تانيه ينادوا عليك الملكين وتشِيل إلطِين ... ساعِتهَا تِبكِي بدَمع العِين تُصرُخْ وتنادِي يغُور الطّينْ سَامحُونِي يا اخُواتِي يقُولوا أسفِين شبيل الطِينْ

# إلأُم

\*\*\*\*\*

إلأم كلمه لمَّا اقولها لازم نقف تعظيم سلام اللى تعبت واللى ربّت يبقى ليها الاحترام كلمه حِلوه بتراضيها مش كتير أبداً عليها تتروى بكاس الحنان كِلْمِة بحبك مش كفايه بهديكى عمري للنهايه حُبِّی لیکی مش کلام الجنه مرهونه بحبك حياتنا سعادتها بفضلك دا انتى سنفيرَه للسلام مليون قصيده مش كفايه

لا مِية مسلسل ولا روايه دي أمى جَنَّه لِلأثام

طب وزعوا يلًا العيديه وفرَّحُوهَا كُل عِيد وفَرَّحُوهَا كُل عِيد هتخففوا عنها شويه وقلبها هيبات سعيد ابدورا حُبْ وحنان تحصدوا جَنَّه ونعيم انشروا سلم وسكلم تكسبوا دُنيَا ودِينْ الأُم كلمه لمَّا اقولها لازم نقف تعظيم سلام

### بنضْحَكْ

\*\*\*\*\*

رَغْم الفقر ورَغْم الجُوع بلِبسْ مِقَطّع أو مَرقُوع مهما حَياتنا تِقلِب لِيل ناس قَايدَلنَا إيدها شُمُوع عَوِّد قَلبَك دايماً يضْحَكْ سِيبَكْ م اللِّي يقلِق رَاحْتَك أُوعَ تنام فِ يُوم مَوجُوع لِيه مَقمُوص بتِنْدِب حَظَّك؟ دا مَهما يكون أشكر رَبَّكْ لِيه تِقضِيهَا ألم ودمُوع؟ بُصْ لجسْمَكْ فيه كَام نِعمَه؟

وسنترُه عَلِيك لِيه كَام مَعنَى! بَلاش تِتلَقَى طُول الاسبُوع مَالُه المَلح ومَالُه العِيش؟! لُقمَه تاكُلهَا أكِيد هَتعِيش مَحَدِّش مَاتْ أبدا" م الجُوع أُوعَ تِبُص فِ يُوم لِلغِير تِنهَب تِسرَق فَاكرُه دَا خِير عَوِّد اِبنَك يبقى قَنُوع إضْحَكْ يَلَّا إفرد وشَّكْ خَلِّى الحُزن يطِير مِنْ عِشَكْ دَا عُمْر الدُرْن مَ كَانْ مَشْرُوع

# بِنْدَارِي

\*\*\*\*\*

مليون حِكاية وَجَع مكتُوبَه بدمُوعنَا مِتشَاله جُوًا القَلْب مَحفُورَه بضْلُوعنا أحلامنا كالسكاكين حَالفَه لَتُوجَعنَا والعُمْر قَطْر وفَات يا مِين پرَجَعنَا ؟! نِزرَع سننابِل خير بالحُبْ تِجمَعنَا نبني بيوت بالقش

فُوق مِنها شَجَرِه بِعِشْ بِتدَارِي أوجَاعنا بِتدَارِي أوجَاعنا نِنام في حُضن الليل مِنْ غِير شَقَا وتفكير ويهل نُور الصبح فتَغرَّد العَصافِير قطرب مسامِعنا دَا العُمْر قطر وفَات يا مِين يرَجَعنا ؟!

# تاج الوقار

#### \*\*\*\*\*

ألفين تحيه وتعظيم سلام للأدب والاحترام للى لابسه تُوبْ عَفِيفْ رافضه تمشى ف الحرام عارفه إن الدنيا فانيه عايشه هِيًا ف دُنيَا تانيه مفهاش وسناوس للشيطان لابسه فوق تاج الوقار تحته مِنُّه إسدال خُمَار فَخْر أبوكي من غير كلام يسلم الأب اللي رَبِّي

يسلم الأب اللي خَبَّى بنته عن عِين الجيران تسلم البنت العفيفه وَردَه طاهره كمان شريفه تشبه الحور ف الجنان كُونِي فاطمه كُونِي زينب دي الشِّياكَه ف الاحترام م النهارده...عَلِّمُوهُم اِشْرَحُولهُم... فَهُمُوهُم للبنات والمدام إِنْ الْتَبَرُّجِ أَكِيدُ حَرَام شرع التَبَرُّج يا ناس حَرام

# حِكْمَة عَجُوزْ

\*\*\*\*\*

إسْمَع ياابني كَلامِي لِلأخِر إسْمَع مِنِّى وخَلِّيكُ فاكِر إنْ الدُّنيَا مُشْ هَتدُوم جسمَكْ سَاتُرُه بَسْ هُدُوم هُمَّا يومِين يادُوب وتسنافِر أُوعَى تِزَعَّل أمَّكْ وأختَكْ أوعَى تِهينهُم لاجْل حَبيبتَكْ كُلُّه مِستجَّل لِيك فِ دَفاتِر ارضى بحظَّكْ مهما يكُون لو عندك أزمه بكره تِهُون ليه مَقمُوص؟ واخدلك ساتر

بَلاش تِتغر فِ الأشكال دا عَرَبيّه ودِي خُلخَال وعَلَى سُور فِيلا كَام تِمثَال الكُل يا وَلَدِي بُكرَه مسافر ليه تِغواهَا وفِيها تِعافِر؟ إمَّا تِسِيبِهَا وإمَّا تِسيبَكْ قالوا عَليهَا زمان غَدَّارَه ليه بتخلِّي سِهامهَا تِصيبَكْ؟ زَي الشَبكَه فِ السِنَّارَه إسْمَع ياابني كلامِي للأخِر إسْمَع مِنِّى وخَلِّيكُ فاكِر

# قَالُوا إِكْبَرْ

\*\*\*\*\*

طَريقَكْ وَرد مَفْروشنه قالوا اِكْبَرْ وابُوك يا واد يبيع الجامُوسَه قالوا إكْبَرْ رَفْ الدُّولاب مَليان هُدُوم مَتروسنه قالوا إكْبَرْ وتبقى ظابط عَمَّكْ فُؤاد جايبلك كُوسَه قالوا أَكْبَرْ وإختار زينة البنات نجيبها لعندك عروسته قالوا إكْبَرْ وتبنِي جَامِع يبقى إسْمَكْ على بابه لامع

وتحج حَجَّه مَبرورَه واَمَّا كِبرِتْ لقيته حِلْم كُلْ اللي قالوا أبطال في فيلم قولت فين ؟ قالوا مين ؟ كَلامْكُم ! وعودكُم! قالوا بَحُ لو كنت فاكِر كَلامْنَا صَحْ اِصْحَى وِفُوق يا ابن المَوكُوسَه

# رفقاً بأبائِكُمْ

\*\*\*\*\*

طبطوا ياناس عليهم بوسوا منهم الإيدين اللى رَبُوا وتعبوا فيكم ياخدوا مِنَّا نِنْ العنين إياك تِزَعَل قلب أمَّكْ أياك تهين شيبة أبوك مهما قالوا وعادوا عنك هُمَّا اللي بُكْرَا هينفَعُوكُ لبسوا زَيَّكْ توب الشباب بَسْ الزمن ملوش كبير خار الجسد منهم وداب خليك ياواد بيهم رحيم

اقعدوا واحكوا معاهم حسسوهم بالأمان

أوعى تحكي من وراهم كبرُوا وصابهم كمان جنان بكلمه جلوه يرضوا عنك أنت برضو .. بترضي المدام لو ف يوم غضبت عليك تحرمك كاس الحنان طبطبوا يا ناس عليهم بوسوا منهم الإيدين

## إلإنضِباط

أخلى حاجه الانضبات للبنين والبنات يبقى نصحى الصبئح بدري مُدرسين ومُدرسات إصْحِي صَلِّي الفجر حاضر بَلاشْ تِعاندِي وقُولِي حاضر رَتِّبِي في الكرَّاسات البسبي محشهم وواسبغ مُشْ فُوشْيَا بمبى لُونْهَا فَاقِعْ الشياكه يا بنت أُمِّي مُشْ دِبَلْ وحَظَّاظَاتْ الشياكه يا بنت عَمِّى

مُشْ أساور مُشْ ساعَات دا العَلَامْ زينة العقول أما الحياء زينة البنات عَلِّي صُوتَكْ فِ النَشِيد والبسبي تاج الكرامه جَنبِكْ النيل المَجِيد والجّبَلُ رَمز الشهامَه سَطَّرُوا لِلذِكْرَيَاتُ فِ الفُسْحَه نايتِي وشبْسَهَات إرمُوا البَواقِي فِ المُهمَلات مدرستنا زَي دَارنا خَلُوا اِلنَّجَاحِ فيها شعارنا مُعلِّمِين ومُعلِّمَات محظوظين إحنا البنات

# قَلْبِك أبيضْ

\_\_\_\_\_

فَخْر لاَبُوكِي وفَخْر لأُمِّكْ وُردَه جَمِيلَه عِطْرِكْ مِنَّكْ مِاليَه الدُنيَا فَرَح وسنعادَه بَنَاتْ الكُون تِتْعَلِّمْ مِنِّكُ إِنْ أَخْلاقِكْ هِيَّ سِلاحِكْ وإنْ حَياءِكْ تُوبْ بيضُمِّكْ تِبدَئِى يُومِكْ بالقُرآن تِقري كمان بالأحكام تِبقِي أمِيرَه لِبنَات سِنَّكْ تِبقِي القَمَرَه فِ عِزْ الليل عِلمْ ينَوّر جَهل الأمّه

إيد بتشييل وَحْل الضَّلْمَهُ
خَلِّي الناس تتكَّ َلمْ عَنَّكْ
بنت أُصُول صَانِت أَبُوهَا
باعت الدنيا لأجل الدينْ
عارفه الدنيا رحلَه قصيره
وانْ جَهنَّم فَارشَه حَصِير
وانْ جَهنَّم فَارشَه حَصِير
وأنْ الأخْرَه دُنيا ودِينْ
فخر لأبُوكِي وِفَخر لأُمِّكْ
وَردَه جَمِيلَه عِطْركْ مِنِّكْ

## زمَانْ

كان زَمَانْ بيْنًا احترام للحبيايب والجيران حتى الغريب بيْنًا كمَان كُنَّا نِصْحَى الصُّبح بَدْري العيون ترمي السلام القُلوب صافيه مسامحه والنفوس رافضه الحرام بلُقْمَه حَافْ نِملا البُطُونْ من غِير مَ نُزْمُر أو نُزُومْ كُنَّا أقوى م الشيطان لمَّا جَارِي بَسْ يتعب نِجْرِي نِخْبَطْ عَ الببان

نِمْسَح الحزن بإيدينا لكل غالى عزيز علينا كُنَّا فِعلاً أُسره واحده شُعُور حقيقى مُشْ كَلام لَفْ الزمان بينًا ودار بَقِتْ العَدَاوَه ف كُل دَارْ ضاع الأدب والإحترام البجاحه والوقاحه فاكرينها مُوضَه أو نصاحَه فَيرَسْ خَبيث صَابْ اللسان هَاج القلم ... صَابُه جِنَانْ لمَّا افتكر أيام زُمَانْ شَخْبَطْ مَحَى كُلْ السُطُور قَرَّر يرُوح وَحْدُه ينام

# كِبرْت خَلاَص

\*\*\*\*\*

خَدت يُومِينِي كِبرْت خَلاَص فَاتُونِي بَاعُونِي أَعَزِّ النَّاس كُنْت شَبَاب زَيِّ الوَرْد مَلُو هُدُومِي بطُولْهَا وعَرْض جيبي مَلْيَان فَكَّه وكَاش بَسْ الدُّنْيَا دَارت بِيَّا شَالِت حَطِّت طَحَنِت فِيًا خَلِّت شَعْري الأسنود شاب كُل حَبَايبي غَدَرُم بيًّا مَحَدِّش دَق عَلَيًا البَاب حَتَّى عِيَالِي إِتْعَرُّم مِنِّي

أَلْف خُسنارَه يَا لَحْمِي ودَمِّي ظَنِّى خَلاَص فِيكُم خَاب هَشْكِي هُمُومِي للي خَالِقْنِي وَارْمِي حُمُولِي بَس عَلِيه رَاضِى يَا نَاس باللي يِصِيبْنِي حَتّى الحُزْن أنا خَدت عَلِيه إِرْحَمُوا قَلْبِي أَنَا رَاجِل شَاب عَضْمِي إِتْكَسَّر حَن ودَاب دَمْعِي خَلاَص رَافِض ينزل مِين يسْتَاهِل أَبْكِي وأنْدِب بقِيت خَلاص مِن العُزَّال بَلاَش تِتْغَر بِيهَا يَا وَلَدِي بُكْرَه وبَعْدُه تِيجِي لْعَنْدِي تِبْقَى مَعَايَا مِن العُزَّال

# لِلرجَال فَقَطْ

\*\*\*\*\*

اِكتِب يا قَلمِي قول حِكَمْ ليه زمانى مَليان فِتَنْ ؟ الصديق بيخون صديقه والقلوب طافحه عَفَنْ إللي ماشيه بوسط سايب لابسه تُوب مقطوع ودايب داري نفسك قبل الكفن اِکتب یا قلمی قول حِکَمْ الأب ماشي شعره شايب والابن فَانكِي كَمان وعايقْ تُوب الحياء فِينَا الدَفنُ

يا بنت ماشيه بلِبْس مايع طَمَّعتِی فیکی شاب صایع لابسه إستريتش وحظًاظات ا طَراقِيع لِبان ومصَّاصَاتُ لاطَّه الخُدُود زي العَوَالِمْ اكتب يا قلمي قول حِكَمْ ليه زمانى مليان فِتَنْ ؟ فين الرُجُوله والشهامه؟ لبسنا ليه توب الندامَه؟ مستنين يُوم القيامه!! خِرسْ اللسان فِينَا إنكتم ؟ ما تنفضئوا يلّا الغُبَار وتحَولُوا ليلكُم نَهار..... كِفَايَه نُوم جَهل وفِتَنْ

## لَحْم رخِيصْ

\*\*\*\*\*

استر بنتك خليك راجل اشخط وانتر يلا يا راجل لحم رخيص هتبيعه لمين؟ بُكْرَا تجيب راسك ف الطين تجرى وراها مع واحد فاجر لبس مقطع باسم المُوضَه نِت وشات جُوًا الأوضك بتبئخ كمان نِيكُوتين وسجاير اشخُط وانتُر يلًا يا راجل مالك واقف تايه حاير اوعي تقولي دِي حُريَّه دِيًا وَقاحَه كمان رجعيه

لمَّا الموضه تبقى أذيه لمَّا الراجل يبقى وَلِيَّه قلمي يغلي دَمُّه فاير قلمي يغلي دَمُّه فاير اشخُط وانتُر يلَّا يا راجل عرف بنتك الحُريَّه ورده عفيفه طاهره نَقِيَّه مش ملبن سايح مش ملبن سايح راشينه نشادر استُر بنتك خليك راجل اشخُط وانتُر يلَّا يا راجل اشخُط وانتُر يلَّا يا راجل

#### یا ابن آدم

كُل أمَّا اقول بُكْرَا اتوب يجى بُكْرَا نَفْس الحِكَايَه أنا كِتفِي شايل فَدَّان ذِنُوب یا مین یشیل حِملِی معایا نَفْسِى ضعيفه غَرقَانَه ذِنُوب والجسم معجون بالخطايا خار الجسد والشعر شاب بَسْ الذنوب لسه شباب يكونش العجوز لازمه ربايه هقوم الصبح اتوضئى أصلِّي ، وأقرأ كَام آيه يا رب إرحم عَبْدَك ضَعِيفْ

نَوَّر طريقي بالهِدايَه تعفى وتمحى عَنِّى الذِّنُوب أعيش حياتي م البداية أمشي صراطاً مُستَقِيمْ لشيطان يوسوس ولاغوايه أبْدُر طريقى جَنَّات نعيم أحصُد ثِمَارُه ف النِهَايَه اعمل لنفسك يا ابن آدم دِي الجنَّه مَفِهَاشْ وصَايَه إيدك ورجْلَك شاهدين عليك أمَّا اللسان ... أسكت كِفَايَه ف النعيم خُدْ كِتابَكْ باليَمِين م الشمال لَفْح نَار فُوق الجَبِينْ دِي كُل دُنْيَا لِيهَا نَهَايَه

#### حُسْن الخِتام

\*\*\*\*\*\*

هَذْتِم حَيَاتِي بالصِّيَام مِن غِير عِتَاب وَلاَ خِصَام كاس الحَياه طَعْمُه غَريب مِنْيُون كَابُوس فِي المَنَام حِلْم الفَقِير مَنْتُوف جِنَاحُه أمَّا اللِّسنان رَافِض الكَلاَم الكُل مَاشِي رَاكِب دِمَاغُه تَاه الحَلال جَنْب الحَرَام! دَوَّامَه دَايْرَه تِلِف بينًا نَسِّتْنَا نِرْمِي حَتَّى السَّلاَم النُّفُوس زَي الفِلُوس

مُش دَايْمَه لِيك طُول الزَّمَان والصَّحَاب زَي الكَبَاب يُوم تِلاَقِي وِيُوم جَعَان والحقيقه واضحه لينا مِن غِير عِتَاب وَلاَ خِصَام الدُّنْيَا دِي مُش دَايْمَه لِينَا قَالْهَا رَبِّي لِلأثام يبْقَى لِيه هَنْمُوت عَلِيهَا بنْعُض بَعْض زَي الحِيتَان إسْمَع نَصِيحَه مِنِّى غَالْيَه إخْتِم حَيَاتَك بالصِّيَام النَّفْس صَح عَلِينًا غَالْيَه إِدْعِيلْهَا يَلاَّ بحُسْن الخِتَام

#### مفيش تَفَاهُم

\*\*\*\*\*

حَدْ عارف حَدْ فاهِم ليه مفيش بينًا تفاهُم؟ الكل شايف نفسه صبح نعمل مشاكل لو حَدْ كَحْ نِطَلَّعْ كلام زَي الخَناجر ليه زمانًا زمن الحناجر تِعَلِّى صُوتَكْ وأعَلِّى صُوتِي بلاش يغُرَّكْ ياواد سِكُوتِي الكُل قاضِي بيدِّي اوامِر يا ناس كفايه شنعن العوالم الناس بتطلع للفضا وإحْنَا بِنْردَح زَي الهَوانِم

تِشْئُقْ خَلَقِي وَأَشُقْ خَلَقَكْ
تِسِبْ دِينَكْ واللي خَلَقَكْ
الأقوى بِيْنَا بالشتايم
فين المَحبَّ َه والسَّلام؟
ليه التَدَيُّن بالكَلام ؟!
عَمَّالَه نِنْطَح زَي البَهايم
السُكُت يا قلمي قُول خلاص
اللهُمَّ إنِّي صَائِم

#### دِين الدَّواعِش

قال الله ، وقال الرسول لما انت فاهم ف الأصول ليه بتحرق ف الجوامع؟ ليه تعيش جُوَّه الصوامع؟ ليه بتكسر قلب أم .. ؟ خلي عندك يا ابني دم بُكرَه تصيبك دعوة أرامِل ذنبه إيه عَيِّل يتيم؟ حولت حِلمُه ف يوم كابوس تسوى إيه دَمعة يتيم لو خدت حتى كُوم فلوس

يعنى إيه دِين الدُّواعِش! يعني قتل يعني مُوت يعنى كُفر لكل صُوت حابب يعيش أمن مسالم طيّب بقولها بأعلى صُوت صُوتي عالي ولو بمُوت مصر مقبرة الغزاه للتار والفرنج وللدواعش هدمتوا ليبيا وَيَّا سوريا وم العراق جايين لسينا دي مصر مقبرة الغزاه واسألوا أحمس ومينا مهما كان البحر عالى ف مُوجُه هتعدي السفينه

قال الله ، وقال الرسول دِينًا دِين سِلم وسلام قُدوتنا فيه خَير الأنام بلاش مُعاندَه كَمان تَخَابر أخرتكو نُومَه فِ المَقَابِر (عُرُوبِتنَا فِينْ؟) مَتقُولُوشْ القُدس ضاعِت دا احنا ضِعنًا من سنين! لَمَّا يرجع دِينًا لِينًا .... يبقى نِرجَع مُسلِمِين لا تقول ترامب ولا أوباما عُرُوبِتنا إحنا الحِلوَه فين؟ كُل الدول رافضه الإهانه إلا العرب قالوا آمين!

نِحكِي نِغَنِّي بالكرامَه والقدس مسرى المرسلين عَمَّال نِوَلُولْ زَي الوَلايَه لَكِنْ الإيدين متقطعين! حَرَّكُوا فِيكو الضماير ليه عَ الكراسي مِطْرمِخِين؟ جايين تقولوا القدس فين؟ تِستَنجِدُوا بصلاح الدِّين بالذمَّه إحنا مُسلِمِين ! وَلّا ضِعَاف مُستَسلِمِينْ كُل واحد فِينا عَامِل... إنُّه وَحدُه بَسْ عَالِم فِ المُوسِيقى والفنون ف الرياضه والعلوم

أمًّا التَدَيُّن... مُتخَلِّفِين الْأُ السِكُوت لِينًا كَرَامَه والكلام يبقى إهَانَه طول مَ العرب مُشرَّدِينْ مُشْ هَنشجُبْ أو نُدِينْ وَلا هَنِحكِي...حُكَامْنَا فِين! اللي فرَّطْ ف عِرضُه وَارضُه يبقى يرُوح ... يشيئل الطين

### سَجِينْ الكاسْ

\*\*\*\*\*

إِخْبَطْ رَاسَكْ فِ أَتَخَنْ حِيطْ مَ إِنتَ خَرَبْت خَلاص البيتْ كُلْ فلوسنَكْ عَ البرشَامْ بعت شبابك للنسوان إيه الفايده جاوبني يا ريتْ؟ جسمَكْ ضايع عقلك خَفْ مُشْ هَيفِيدكْ كُترْ اللَّفْ مَهِمَا عَانِدتْ واتحَدِّيتْ ماشى مصاحب للشيطان رافض تسمع أي كلام دا انت ضِعِفتْ واتهَدّيتْ فَتَّحْ عِينَكْ شُوفْ الناس إنسنى شويه سبجن إلكاس

حَسِّنْ سيرتك فَرَّحْ عِيلتَكْ ذاكر لابنك أحضن بنتك خَلِّي حَنانَكْ جُوَّا البيت لَرفَعْ إيدك يَلَّا وتُوبْ قادر يغفِر أي ذنُوب قادر يغفِر أي ذنُوب ظَهَرِتْ مِنَكْ أو خَبِّيتْ صَحصَح فُوق يَلَّا ياريتْ

#### يَا رَايقْ

\*\*\*\*

بَطَّلوا شُرب الهِبَاب وَفَّرُوا جِنِهِين تلاته إعمِلُوا حاجه للولاد بَطُّلُوا ياناس تَبَاتَه قَبِل مَ تِجُوع البُطُون قَبِل مَ تِبِيعُوا الهِدُوم اصحى فوق خُد قرار لِيه ف عِينَك الانكِسَار؟ يَلا سِيبِهَا فِزْ قُوم عَمَّال تِبُخ \_ تِتنَخِّم تِتِفْ عَقلَكْ باينلُه يبر وخَفْ مِعَبِّي جِيبَكْ بالسُمُوم وِالبِيت مَفِيهْش فَصْ تُوم وَالبِيت مَفِيهْش فَصْ تُوم طالع لابُوكْ كَييف ياواد وَرَثتْ مِنُه شُربْ اِلهِبَابْ باع اللي حيلتُه ف الدُولابْ والأم شَايله كُومْ هُمُوم والأم شَايله كُومْ هُمُوم لِمين هتحكِي تِشكِي تِلُوم؟ لِمين هتحكِي تِشكِي تِلُوم؟ مَ الأبْ عَايق فَايق وِرَايق مَ الأبن عَايش فِ مَيّة لَمُون

#### كيس سُكُّر

\*\*\*\*\*

معایا کِیس سُکَّر ياناس من قدِّي بشرب شاي وأهز ف خَدِّي بشفط واتمطع باخد وأدي ولا فيش أزمة ما هو وقت اللازمه !! تحسبها صح يا ابو مُخْ مِصَدِّي معاك تموينك مُشْ مالي عينك؟ تروح للغالي تتفشخر تجري بَلاها سُكّر بَلاها شاي

ليه بتولول رايح جاي؟!
ما كنت زمان متمرمت فقري
فاكر العسليه صابع فينو
وفاكر المشْ عِلبة دومتي
جمد قلبك قاطع يلّا
فَضِّي شويه ياخوي الحَّله
خليكي دُغري
مالك انت ومال الناس
تحب تِقلد تِظيط وخلاص
نضف عقلك يا ابو مُخْ مِصَدِّي

## دَقْ القَلبْ

\*\*\*\*\*

دَقْ القَلبْ خَلاصْ حَبِّيتهَا رُوحْت لِبِيتهَا قَوام أخطُبهَا فَرْ أَبُوهَا وقَالِّي ياوَلَدِي ألف جرام لِزُوم شَبكِتها مُشْ هَنغالى ياابنى عليك زَي مَ جابت بنت خالتها اما العَفْش دا أمْرُه بسيط تِشْحِنُه كَاشْ أو تقسيط حاجه براحتك انت حبيبها هات الشيش ويا النيش ولازم تعمل لأمَّكْ فِيشْ تجيب تفاصيل كل عِيلتها أما العُرسْ دا لازم قاعه

أو عَبَّارَه مَكان مَ تجيبها دِيًّا جَوازَه سَهلَه بَسيطَه تِصرِف فيها كُلْ التَحويشَه تِسحَب قرَضْ للسَنيُورَه وَلَو مُشْ عَاجبَكْ ولَو مُشْ عَاجبَكْ المشيي في غُورَه المشيي في غُورَه دَقْ القَلب خَلاص حَبيتها خَرَبِتْ بيتي يخْرِب بِيتها خَرَبِتْ بيتي يخْرِب بِيتها

## سبهام الغدر

\*\*\*\*\*\*

عِنَادِي مَعاكِى هَيطَوِّل لأنَّكْ بعتِي م الأوِّل سبهام الغدر مِنْ طَبعِكْ وِعُمْري مَ قَلبِي يتسَوِّل غَبَاء الدُّنيَا يشْبهْلِكْ جيناتِكْ ورثْ مِنْ أَهْلِكْ ضَيعتِي حُبْ عِبنَوِّل خَلاص هَبْعِد وَهتحَمِّل فْ قَطْرِكْ عُمرِي مَ هَكَمِل مَشَاعري حَالَفه تِتحَوِّل خَلاصْ رُوحِي لِسنيُورِكْ أكيد رَتِّبْ كمان دُوركْ لِقَلبِكْ يبكِي وينَوِّح

مِشْبِيتِي فْ سِكَه بَطَّالَه رَسَمْتِي عِشْتِي فْ الْحَالَه وحالتِكْ سَهْلَه تِتلَوِّن بحق المَولَى وكْتَابُه بُحُور الشِعْر وابوابُه عِنَادِي مَعاكِي هَيطَوِّل لأنَّكْ بعْتِي م الأوِّل

# الله يسمَهْلُكُ

\*\*\*\*\*

راجعَه تقولي بحِبَّكْ ليه؟ مبقاش لیکی ف قلبی مکان بعتى وخُنتِى مِنْ غير ليه نِسِيتِي حَنانِي وحُبِّي زمان رُوحِي خَلاص الله يسَهْلُكُ قَلبى إتعَقَد عَ الحرمان عُمري مَ اطاطى ولا اتذللك قَلبِي بَرئ وقَلبِكْ خَانْ وَفّري يَلّا كُلْ دمُوعِكْ مُشْ هَتفِيد أبدا" لرجُوعِكْ مُشْ هَدِّيكِي تاني أمَان قِدتْ صَوابعِي ليكي شُمُوع كُنتْ الإنس وكُنتْ الجَانْ

رُوحِي خَلاص الله يسَهْلَكُ عُمرِي م اطاطي ولا اتذللك دا المستُور عَلَى أصلُه بَانْ وانتَ يا قَلبِي اِتعلِّم وِاقْهَمْ إياك تِعْشَق حَدْ جَبَانْ

#### بصالی لیه ؟؟؟

\*\*\*\*\*

ناس كتير عِرْيَانَة مُوضَة أما إنتي عرْيَانَة غَصب وشِنِّكْ بيحكي ألف ليلة عنيكي سارحَة ف ألف عِيْلَة فاكرة السعادة مَصْبوبَة صَبْ فاكرة الليالي

أُمْي الحَنُونَة وإن النهار ليكي أَبْ لا يا بنتي إحنا ف غَابَة فيها الأسنود

> وَاكلَه الغَلابَة فيها الكِلابْ

مصاحبة الديابة يمصوا دَمِّكْ يرمُوكِي عَضْم

مين اللي خانك
وسرق مكانك ؟!
مين اللي باعك ؟!
مين اللي راسم
مشروع ضياعك ؟!
مين اللي غَبَّر وِشِكْ وراسك
مين اللي عَرَّى كِتِفْكْ وباسِكْ ؟!
مين اللي عَرَّى كِتِفْكْ وباسِكْ

تقضي شبابك صراخ ولطم آآآآآ ه عليك يا فَقْر حِلمْ الفقير خُليتُه قَهرْ وعجبي!!

## تُوتَه وتُوتَه

\*\*\*\*\*

هَحْكِي حِكَايَه كَمان حَدُّوتَه عن طفل صغیر کان مسکین كل حياته عايشها حزين لحد م شاف بنت صغنطوطه شافته الحلوه نادى عليها ساح الواد ف كُعُوبْ رجليها ضحکت لیه. جریت مکسوفه نادى عليها قوام يلاعبها طفل برئ وقلبه رايدها بَسْ لِحَظُه كانت مخطوبه لابن خالتها غني ومِثْرَيِّش

ايده مَليانه يدفع وِيكَيِّش وأمَّها بيه فرحانه مبسوطه أما الفقري قلبه يموت مهما يدق نهايته سكوت حياته مغامره مُشْ محسوبه نهاره عذاب ليله دموع حتى الفرحه ماليها شموع كل أحلامُه رَغَبَاتْ مَكْبُوتَه تُوتَه وتُوتَه وكَمَان تُوتَه أدِي حِكايتي. طِلْعِتْ مَلتُوتَه

# إثْبَسِّم

بَقُوم الصُّبِح أَتَوضَى الصَلِّي وأقرا كَام آية وأبدُر خيري عَلَى أهلِي بِسَمَه لابسَه ضحكايه جَنَاين حُبْ تِجمَعنَا بِداعِبْ كُلْ وُردَايه نِداعِبْ كُلْ وُردَايه أرُوح شُغلِي وأتكلِّم أرُوح شُغلِي وأتكلِّم عُيُونِي سَابِقَه بِتسلِّم عُيُونِي سَابِقَه بِتسلِّم وشوش الناس بتتأمِّل فأتمايل واتبَسِمَ

كأن مَلامحِي ف مِرَايَه مدارس حُبْ هَنعَلِّم هَنِضْحَكْ قَبلْ مَ نِسَلِّم هَنعَلِّم هَنعُرِسْ حَبَّه وِنَوَايَه قَوافِل خِير هَنِتقابِل قوافِل خِير هَنِتقابِل نشوف الناس ونقابل وكام قَعدَه ف سِهرَايَه حَياتنا جَمِيلَه هَنعِيشها حَياتنا جَمِيلَه هَنعِيشها ونِنعِشها ونِنعِشها ونحكِيها كَذَا حكايَه ونحكِيها كَذَا حكايَه

## أبي الغالي

قَرَّبْ عَلَيَّا أَبُوسْ إيديكْ ومُشْ كِتير أبداً عَليكُ دا إنتَ جَنِّة رَبِّي لِيَّا فَرْحَه مَاليه الدُّنيا دِيًا عُمري كُلُه هَدِيَّه لِيكْ طُول النَّهَار شَقيان عَشانِي بابا الحبيب تاجِي و زَمَانِي بَحِبَّكُ كمان وبغير عَلِيكُ قَرَّبْ عَلَيًا أبوسْ إيديكْ ومُشْ كِتير يابا عَلِيكْ إنت المَحَبَّه والأمَانُ بابا الكريم نَبعْ الحَنَانْ

كُلْ الصِفَات الحِلوَه فِيكْ بِدْعِي رَبِّي يحْمِي شَبَابَكْ لا يُوم نُشُوف أبداً غِيابَكْ الفَرْحَه دايماً تملا عنيكْ ومُشْ كِتير أبداً عَلِيكْ

### شكة دَبُّوس

\*\*\*\*\*\*

نِفسِى أشُوف الكُل حَبَايبْ أهل جيران أُخْوَه قرايب ننستى اللوم الخوف والبغد نِخَلِّى قُلُوبْنَا تِحِنْ لِبَعضْ طِفل صُغَيَّر أو كَانْ شَايبْ يَلاَّ نِحِبْ بَعضِنَا جَد حَبِل الحُبْ بتاعنا دَا دَايبْ كِلْمَه جَمِيلَه تِوَحِّد عِيلَه أمَّا القَسْوَه تِجُر مَصَايبْ نِبدَأ يُومْنَا نِصَلِّى فُرُوضْنَا نِقرأ أحَادِيثْ سُنَّه وقُرآن لازم نرضى باللي يصيبنا كُلُّه مِقَدَّر م الرحمَن

خَلِّيكْ دايما" إنتَ الفَايِزِ ابُدُر خِيرَكْ بين النَّاسْ تُحصد مِنَّه بُكرَه جَوَايز كُلْنَا راكبين قَطر الدُّنيَا بنِقْطَع لاَزِم فِيهَا تَذَاكِر

# أخِي الكبيب

\*\*\*\*\*

مُشْ كِتِير أبداً عَليكْ إنِّى أبوسنك بين عِنيك إنِّى أشِيلَكْ جُوَّا قَلبي وأقفِل بيبَائُه كَمان عَلِيكُ اللي ضحَّى بعُمْرُه لِينَا قُبطَانْ هُمَامْ قَاد السَفِينَه اللى رافع راسننا دايماً كُلْ أُمَّا نِضْعَف إيدُه ف إيدِينا مُشْ كِتير أبداً عَلِيكُ كُلْ الصفات الحِلوَة فِيكْ كُلْ خَطوَة بنعْلَى بيها أكيد أساسها بَرَكِة إيدِيك

اللي يعرَف أخْ زَيَّكْ ويحتمي كَمَانْ ف ضَيَّكْ يَهْدِي عُمْرُه كُلُّه لِيكْ مُشْ كِتِيرِ أبداً عَلِيكْ كلمتين يتقالوا عَنَّكْ دا يامًا قالوا وعَادُوا عَنَّكْ المروءه والشهامه التواضئع والكرامه تاج الوقار لايق عليك بَحر الكلام ليك مأشْ كفايه لا ألف قِصَّه ولا روايَه تِقْدَر تِوافِي الحِلو فِيكُ مِنْ كُلْ قَلبي بَدْعِي رَبِّي بفرحه حِلوَه تِملا عِنِيكُ

## شَابُ الشَّعر

\*\*\*\*\*

وشَابْ الشَعر فِ التلاتين من غِير لا عَيِّل ولا تَيِّل رَسَمْت أحلامِي فِ العشرين وطِلِعْ الحِلم مِتنَيّل وبُكَرا عَجُوز فِ الخمسين وَأعِدْ بضهري م الأول يا دُنْيًا رافضه أحلامي م كُنتِي تقولي م الأول يا قَطْر العُمْر ليه ساحِب؟ واخِدْنِي معاك أنا صاحِب! تكونش عَليًا بِتْفَوِّلْ عَمَّالَه تِلْفِي وتدُورِي

يا دُنْيًا فين أنا دُوري؟ ظَالمَانِي مِنْ وأنا عَيِّلْ معَاندَه مَعايَا مِنْ صُغري بتيجي لِعَندِي وبتِجْري قوليها صريحه أو دُغْري عِنادِي مَعَاكُ هَيطُوِّل يا أهلي وكُل أحبابي يا روحي ساكنه جِلبَابي بلاش تتعاتبوا وتلوموا عرفتوا ظروفي وهمومي وكُنتُوا مَعَايَا مِ الأول

# نام وإتغطًى

\*\*\*\*\*

نام والتغطّى رَيّع بالك تِقْلِبْ تِعْجِنْ وَلا عَلَى بِاللَّك ياما شِقِيتْ وتعِبتْ كتير لبسنت الخيش للتوفير ولسَّك باقي أدِيكْ عَلَى حَالَك تِضْرَب بُوز يقولوا دا نَكَدِي ولمَّا بتضْحَكْ يبقى هَنيَّالَك أصل الناس مَ بترحَمشِي كَلْتَهَا حَافْ وَلَّا بِدُومْتِي جبت منين فَضْلِهُ مَالَكُ

تِلْبِسْ شِيك ولا مِرَقّع كُوتشي أميكُو وَلَّا مِقَطَّع مُشْ سَايبينك بَرضُو ف حَالَك يبقى تعيش ضاربها طَنَاشْ وترمِى وراك كلام الناس إسعد بيتك وأم عيالك فَكّر بَسْ تصاحِب أهلك مَتَّعْ نفْسَ َك بِكَلال قِرشَكْ صِلِّ الفرض وصِلْ أرحامَك طَهَّرْ نَفسنكْ بزكاة مَالَكْ

#### تجاعيد

\*\*\*\*\*\*

كل يوم يطرح ف وشي كرموش جديد الشعر شاب والعقل خرف أما الإيدين دبلت أكيد راح خلاص زمن الشباب زمن الفتوه زمن العزيمه كانت حديد دا أنا لسه فاكر يوم طفولتى ولبسى الأبيض كل عيد فجأه كبرت ولقيت ف حجرى خمسين حفيد

لسه فاكر جريي حافي ف الشوارع تنده عليا أمي یا واد ... یا واد أضحك وأجري عنها بعيد أغمض عنيا مستخبي أتاري الزمان كان لي مخبي توبي الجديد توبى العجوز توبى المكرمش توبي اللي مليان تجاعيد

## نفسي أكْبَر

\*\*\*\*\*

من زمان كان نفسي أكْبَر وإن حلمي معايا يكْبَر أفرد دراعي زي أبوي أشخط وأنتر وأرمي العبايه فوق كتافي تقولش عنتر من زمان كان نفسى أكْبَر وإن حلمي معايا يكْبَر كنت فاكر الدنيا حلوه مرشوشه سُكّر وأما كبرت مبقيتش أفكر

م إتلخبطط كل الحكايه والدنيا فيا عمال تِكَسَّر الزمان غير الزمان والعشش صبحت بيوت أما الأماني محتاجه سُكّر من زمان كان نفسى أكْبَر كان لى بنَيَّه عايزها تكبر وأما كبرنا خطفها المغندر زمان کان کل شی حلو ف عِنيًا من غير كلام كُنت فاكِر حِلمي كِبير أتاري حلمى كان بيصغر

#### ایده ؟؟

\*\*\*\*\*\*

ليه تتشبّه بالنسوان ؟ دا حتى حَرام سئنَّة وقُرآن إرجل يابني شويه إخشوشن ليه بتسمهوك وبتسمهتن كمان بتطرقع تشييكلس ولبان بابا ومامتي نينا وتانتي مِجَلجِل شَعرَك عَاملُه سبايكي تفرق إيه عن الخرفان ؟! وَستع لِبستك خَلِيك راجل عُمر الرَهرَطَه مَ تجيب راجل ليه بنقلًد زَي العِميان ؟

أُختك طَيّب مين يحمِيها ؟ ما انت خلاص بقیت زییها ناقصك بس .. تِلبس كِردان ِ والله زمان أحلى أيام زمن السبحة والجلابيّة ولَمّة عِيلَه عَ الطّباليّه ناخد بعض بالأحضان نحكي ونضحك حِلوه قلوبنا لما تكون أبيض وأسود مأش ألوان (تیجی نتخًل) إنْ الشمس بتضحك لينا وإن الأرض قلبت جنَّه وإحنا ملايكه بنمشى عليها

تيجي نتخيل إنْ الخير مالى الدنيا وإنْ الشر مبقاش فيها تيجي نتخيل إنْ بناتنا صبحت حُور لابسه حجابها جُوَّا اِلدُّور ولا فيه شاب يقرب ليها تيجي نتخيل إن مفيش بينا فقير ولا فيش واسطه ولا فيه كُوسنه كُلْ مواطن عنده ضمير يخاف ع الناس مش يطمع فيها تيجي نتخيل إنْ العدل مالي الكون

لِكُلْ فصيل جنس ولون وإنْ الدنيا بتِ ْحِن علينا تيجي نتخيل إنْ أطفالنا صبحوا عباقرة دول أساتذه ودول دكاتره تيجي نتخيل إنْ شبابنا سادوا العالم وإنْ أخلاقنا زي نبينا وإنْ هلالنا جنب صليبنا وإنْ حماده يشبه مينا تيجي نتخيل .... بس خلاص كفايا تخيل

### السيرة الذاتية

\*\*\*\*\*

زكريا ضاحى توفيق محمد مواليد / القوصية / أسيوط يعمل معلماً للغة العربية - ليسانس دار العلوم / جامعة المنيا // دبلوما عامة في التربية – جامعة أسيوط // ملقب بشاعر الغلابة حاصل على أوسمة ذهبية في مجال شعر العامية من : 1- مؤسسة عبدالقادر الحسيني الثقافية 2- مؤسسة ضياء الجبالى للثقافة والفنون 3- نقابة شعراء مصر تحت التأسيس

سنابل الخير

( أشعار )

4- فريق بكرة أحلى لرعاية المواهب
 للتواصل موبايل / 01093898393
 للتواصل فيس بوك / شاعر الغلابة

### محتوى الكتاب

| الصفحة | عنوان النص    | م  |
|--------|---------------|----|
| 2      | بطاقة الكتاب  | 1  |
| 3      | إهداء         | 2  |
| 4      | هيغرد العصفور | 3  |
| 6      | ياوطن         | 4  |
| 8      | الإبتسامة     | 5  |
| 10     | های وبای      | 6  |
| 14     | كوم تعابين    | 7  |
| 16     | الأم          | 8  |
| 18     | بنضحك         | 9  |
| 20     | بنداری        | 10 |
| 22     | تاج الوقار    | 11 |
| 24     | حكمة عجوز     | 12 |

| 26 | قالوا أكبر    | 13 |
|----|---------------|----|
| 28 | رفقا بأبنائكم | 14 |
| 30 | الإنضباط      | 15 |
| 32 | قلبك أبي      | 16 |
| 34 | زمان          | 17 |
| 36 | كبرت خلاص     | 18 |
| 38 | للرجال فقط    | 19 |
| 40 | لحم رخيص      | 20 |
| 42 | یا ابن آدم    | 21 |
| 44 | حسن الختام    | 22 |
| 46 | مفیش تفاهم    | 23 |
| 48 | دين الدواعش   | 24 |
| 53 | سجين الكاس    | 25 |
| 55 | يارايق        | 26 |

| 57 | کیس سکر     | 27 |
|----|-------------|----|
| 59 | دق القلب    | 28 |
| 61 | سبهام الغدر | 29 |
| 63 | الله يستهلك | 30 |
| 65 | بصالی لیه   | 31 |
| 68 | توته وتوته  | 32 |
| 70 | اتبسم       | 33 |
| 72 | أبى الغالى  | 34 |
| 74 | شكة دبوس    | 35 |
| 76 | أخى الحبيب  | 36 |
| 78 | شاب الشعر   | 37 |
| 80 | نام واتغطى  | 38 |
| 82 | تجاعيد      | 39 |
| 84 | نفسى أكبر   | 40 |

| 86 | ليه            | 41 |
|----|----------------|----|
| 90 | السيرة الذاتية | 42 |
| 92 | محتوى الكتاب   | 43 |